

FinanceMission

In engaschament da la Banca Chantunala Grischuna en favur da la cumpetenzza finanziaria

■ (cp) La Banca Chantunala Grischuna (BCG) s'engascha ensemen cun las 23 ulteriuras bancas chantunalas, l'Associaziun tetgala svizra da magistras e magisters (MCH) ed il Syndicat des enseignants romands (SER) per la promoziun da la cumpetenzza finanziaria. Il project naziunal FinanceMission ha la finamira da sensibilisar giuvenils per ina relaziun conscienziusa cun ils daners. Plinavant vul el promover a moda persistenta la furmaziun generala en connex cun las finanzas. A partir dad oz stat a disposiziun il giu «FinanceMission Heroes» ed ulteriur material didactic accompagnant per l'instrucziun – ina purschida scolastica innovativa.

Tenor l'Uffizi federal da statistica vivan en Svizra 27 pertschient dals giuvenils tranter 18 e 24 onns en ina chasada cun retards da pajament. Sch'ins quinta vitiers autras sorts da debits sco per exempel surtratgas dals contos, leasing da vehichels u impègn averts visavi parents ed amis, èsi schizunt passa 50 pertschient dals giuvenils en la vegliadetgna da 18 fin 24 onns che vivan en ina chasada indebitada. Giuvenils èn en general conscients da la responsabladad en contact cun daners. Els èn dentant exposts adina pli savens a tentaziuns da consumar – p. ex. tras online shopping, cumpras InApp u pajaments digital. Plinavant è per in giuvenil gist il temp ch'el daventa independent e tschertga l'emprima atgna abitaziun il privel grond da surstrapatschar las atgnas finanzas. Cun far debits gia en giuven onns crescha la ristga da crudar en ina spirala da debits durabla e problematica. Mintga terza persuna che fa en la vegliadetgna da 18 fin 25 onns l'emprima giada debits ha – sco quai ch'in studi dad Intrum Justitia mussa – era tschintg onns pli tard impègn averts. Per prevegnir effectivamain a debits èsi perquai essenzial da s'occupar ad uras cun daners e consum. Pli bler savida davart finanzas e chapientscha per dumondas da budget ch'insatgi ha e pli pitschna è la probabilitad ch'el survegn problems finanzia.

Engaschament cuminaivel en favur da la cumpetenzza finanziaria

La Banca Chantunala Grischuna s'engascha perquai en favur da la cumpetenzza finanziaria da giuvenils. Ensemen cun las 23 ulteriuras bancas chantunalas, l'Associaziun tetgala svizra da magistras e magisters (MCH) ed il Syndicat des enseignants romands (SER) è ella la purtrada dal project naziunal FinanceMission. A Basilea han ins preschentà ier il project a la publicitad. Quel ha la finamira da sensibilisar giuvenils per ina relaziun conscienziusa cun ils daners. Per quel intent mett'ins a disposiziun gratuitamain ma-

terial didactic adattà als plans d'instrucziun per promover la furmaziun generala finanziaria.

Gieu d'emprender e material didactic interessant

L'emprima purschida da FinanceMission cumpiglia il giu d'emprender digital «FinanceMission Heroes» ed ulteriur material didactic accompagnant. Ils scolars pon telechargiar il giu sco app sin lur smartphone u al dar al computer. Els giogan la rolla d'in supereroc e ston liberar ina citad fictiva da roboters maligns e raffants. Ins sto tscherner strategias da finanziaziun adattadas per armas, disponer bain dal temp e budgetar gistamain. Uschia emprendan scolaras e scolars tgunschamain d'ir enturn a moda cumpetenta cun las finanzas. Per il diever didactic cumpiglia «FinanceMission Heroes» material d'instrucziun accompagnant adattà per il stgalim secundar I (giuvenils da 13 fin 16 onns). Ils moduls ed ils fecls da lavur lubeschan da sa confruntar a moda accompagnanta cun la tematica dal giu. Strategias tschernidas duain vegnir discutadas, analisadas criticamain e transferidas sin situaziuns dal mintgadi dals giuvenils. Las scolaras ed ils scolars survegnan uschia ina nova perspectiva sin lur relaziun cun las finanzas. «FinanceMission Heroes» stat natiralmain a disposiziun als giuvenils er ordaifer l'instrucziun ed è in giu per il temp liber interessant e divertent.

FinanceMission: Ina contribuziun a la furmaziun generala finanziaria

Cun l'engaschament per FinanceMission surpiglia la Banca Chantunala Grischuna responsabladad sociala ed ella contribuescha essenzialmain a la furmaziun generala finanziaria da giuvenils svizzers. La relaziun conscienziusa cun ils daners è in pass impurtant dal svilup persunal ed in factur da success ecologic da nossa societad. FinanceMission s'orientescha plinavant als principis etics definids rigurusamain: la Banca Chantunala Grischuna na prenda nagina influenza sin ils cuntegns da la purschida didactica e na nizzegia betg l'engaschament per far reclama per products u per acquirir clients.

Il material didactic ed ulteriuras infurmaziuns pon las personas d'instrucziun, geniturs ed autras personas interessadas retrair gratuitamain sut www.financemission.ch. Il giu «FinanceMission Heroes» pon ins telechargiar directamain via www.financemissionheroes.ch ubain via «Google Play» e l'«App Store». Il giu è dà liber da Pegi Rating a partir da 7 onns e na cuntegna naginas cumpras InApp.